

重修廣平府志卷三十八

古蹟略 署宅 坊表埒

永年縣

信宮在縣西北

大清一統志

趙武靈王元年魏韓來朝信宮

十九年正月大朝信宮

方輿紀要作十八年誤

正義曰在臨洺縣

史記趙世家

萬春宮在縣治南今湮

大清一統志

唐武德二年竇建德取

洺州築萬春宮徙都之

舊志

案方輿紀要長春宮在府治南舊志永年縣新志均

作在府治東未知孰是

檀臺在臨洛鎮北舊志趙成侯二十年魏獻榮椽因以為

檀臺

史記趙世家

檀臺在洛州臨洛縣北二里

括地志明白南金詩莫

怪成侯竟不歸檀臺今已作漁磯可憐魏獻榮椽後一響秋聲送落暉

案史記集解引徐廣曰襄國縣有檀臺攷襄國今順

德府邢臺縣去臨洛縣六十餘里中隔沙河當是別

一檀臺

廉頗臺在洛州城南十里十六國春秋冉閔遇慕容恪

於廉臺十戰皆敗即此

元和郡縣志

案晉書慕容恪傳恪討冉閔趣常山恪追及於魏昌之廉臺十戰皆不勝襄宇記魏昌故城在無極縣

東南二十八里魏書地形志無極有廉臺在今正定府無極縣據此則洺州之廉頗臺與廉臺不同地元

和志殆誤引

靈臺在縣南八里相傳爲趙王靈臺至今樵豎呼爲靈臺坡築土高數十丈闊一百五十畝皆有甬道東向其

西又有一臺今耕爲官田無賦稅疑卽此臺

畿輔通志

善政樓在府治前元總管邢秉仁建

同上元王士熙記古之善治民者

嚴號令謹儲備通貨幣興廢舉滯使民不倦聖朝區別疆宇設路以莅州縣廣平路肘翼太行背沃洺水壤地長闊風俗循美延祐戊午撫州路總管邢侯移治廣平問俗設教井井有方以路治之前有廢址突起可以增而爲臺觀室宇侯相其宜謀於同僚曰五路麗誰不設而枹柝之警無以肅衆庫藏陳陋而公帑之儲虞於蠹

傷蓋卽是廢址從而偕作之豈不爲一路之偉觀乎乃倡輸廩稍寮佐叶謀鳩工庀事璧址爲臺廣數丈其高半之臺上爲室以宅漏鼓堅峻宏敞宜於警退揭之以名曰善政其左爲二庫曰常盈乃帑藏之所儲曰平準行用乃貨幣之所通鑄密奧深宜於積久是役也一舉而羣美具焉因廢以作新則工不勞因庫以致警則得所防因臺以謹藏則無所虞邢侯之治善矣旣落成其郡之耆舊副使劉鑄等相與特赴京師求士熙記之樓卽工於延祐六年十月成工於七年九月侯名秉仁字仁甫彰德人

愛古軒在府署明成化間知府秦民悅建置蔡邕書夏承碑於內嘉靖間築城碑毀於工匠知府唐曜重摹之

畿輔通志

同治九年知府長啟因愛古軒舊匾遺失改爲

復古軒

房冊明王經歌高軒愛古因何名漳川太守還獨醒忽見豐碑臥蔡荆剔苔掃蘚離秦坑洗

滌文辭表夏承炎祚至今幾變更中郎字畫鬼神驚護守千載待光亨前此有客心目盲伯樂一顧騏驥鳴忽

焉起登對軒楹龍翔鳳翥相崢嶸煥發光彩如瑤瓊神  
物端俟八柱擎觀者方知祥瑞呈周宣石鼓草野橫岐  
陽置後覆蕭蘅幸我真主位承明移送太學咸登閔汾  
陰古鼎表昇平雷澤網出龍梭騰若碑非我太守評時  
人那得重藍瑛世間何地無俊英願我太守持權衡拔  
茅連茹上神京大振文化銷甲兵柳炎歌初觀鳥跡  
開人文蒼然書法皆天眞屈強盤拏骨格均沿洄世代  
還相因周史秦相二篆出漢有八分更超軼我聞石壁  
太學前六經多賴中郎筆中郎一去千載餘廟堂手迹  
隨邱墟斷碣殘碑亦湮沒那知猶有夏承書夏承昔作  
涪于長得公此刻延清響何時點畫蝕莓苔中夜精光  
橫草莽潭潭郡治東塊然同瓦礫秦侯忽見之欣動爲  
洗滌摩挲竟日愛書古起立幽軒脫塵土始知舊物鬼  
神扶珍重也宜同石鼓輕如墜露重崩雲縱橫矯矯蛟  
龍羣眼中俗子誇今文家雞野鷺徒紛紛我欲濡毫一  
揮手臨池學古大如斗只恐旁人爲掣肘軒前且飲杯  
中酒大興翁方綱歌并序廣平郡廨愚据宋拓舊本  
爲摩勒漢夏承碑此軒二百三十載復見建甯碑未改  
迴視漳川講舍摩何減穿暈痕猶在此碑出土升此軒  
隸釋當時笑隸原豈意芝英金薤氣仍飛棟戶遶梁間

秦公愛古非全收一半字經成化補那須款記認陳留  
除卻中郎復誰語從今莫詡都南濠愛古軒碑價更高  
涇陽張公此軒主一笑對客浮春醪前石後張兩賢守  
快比秦唐金石壽摹碑書扁力何有區區賤子亦藉傳  
不朽

後樂亭在東門外明嘉靖間知府唐曜建

縣志

今圯

採訪冊

唐曜記廣平故趙地也澤鹵磽瘠無材竹繡旄丹漆之  
饒商賈舟車之所不至大較務耕桑安其土著然粟帛  
稍羨卽市狗馬窮聲伎以自奉急則椎剽爲姦不休豈  
非席好氣任俠之風哉比歲數有邊警築三關以扞畿  
甸羸糧負輓一切休養慰輯之明年丙午歲大登民樂  
其業始因民之樂治亭於陽和門外郡中無佳山川惟  
城四周雜植槐柳池水環之有荷有魚髣髴南土視郊  
垌爲勝東門之隅地旣疏曠池益廣花卉益茂視他所  
爲尤勝亭於斯俾邦人士游息焉秋九月亭成集賓僚  
父老而落之樂甚予舉觴而屬客曰嗟乎昔日者軍興  
民病於歲簡書簿領日夕埤益於予予思欲緩帶躍馬  
逃於昭曠之野仰高頓深以紓吾抑鬱亡聊之懷而時

乃繆斲不然今者家有露積之庾關省誰何之卒境息  
枹鼓之警野無愁歎之聲而予得以優游無事以樂於  
此詎非大幸哉危然後存而樂常生於憂患理有固然  
者然予逖觀古之君子感會風雲致身日月之際或剖  
符竹建旗鼓爲方國屏翰其所寄迹行道之地曷嘗不  
欲取榮名流播罔極哉而漸盡泯滅不可比數者何限  
惟南國之棠相戒無翦而峴山之石百世讀之者猶涕  
下交頤其故可知也嘗試與子登臺而望之想其盛時  
士馬繁壯封壤廣饒曼胡詩比之雄姣麗窈窕之色靡  
曼要眇之音快意當前自以爲極泮渙之娛而人世代  
謝忽已如飈霆之過耳荒臺蔓草曾不足以起後世之  
一咄由是觀之感應機也廢興時也彰往示來在彼不  
在此審矣是故沃土不材勞民向義自古記之唐俗勤  
儉瘠土之民也其詩曰無已太康職思其居好樂無荒  
良士瞿瞿迨夫山有樞始相勸以爲樂示樂不可極當  
審所先務也故說詩者稱其憂勤有堯之風邯鄲之郊  
去堯都平陽數百里固曩時畿內之地三晉之餘業而  
唐叔之遺黎也矜慎巧姦歌舞騎射武靈惠文之故俗  
誾誾然羣趣而樂之顧不能憂深思遠推而挽之以復  
唐之遺風不已惑哉今天子涵育羣生上躋陶唐况畿

重修鳳平府志 卷三十八  
服之氓王化所先苟思所以不辱於陶唐氏之遺則將  
瞿然曰憂其職之所當盡而不淫於佚樂理民者遙觀  
其成亦藉以免於奪精而不辱夫亮惠之寄庶幾後此  
而樂可久也不然怙淫沈湎方危殆之懼而又奚樂哉  
故曰至樂活身無爲幾存欲用道術以輓民者固在所  
決擇矣客曰唯唯因名亭之楹曰後樂且記其說以自  
省覽

燕譽亭在府署內明嘉靖間知府唐曜建爲習射之所

舊志今圯

房冊

唐曜記

府治東有圃在昔嘗以藝射歲

久浸廢予乃屏榛翳治矢道爲亭三楹前庇以  
廈如亭之數暇日悉率引弓之民教之冀必有奮武握  
奇者出焉偕作以敵王所愾不直輯甯一障而已亭成  
予與二三子觴於其中正鵠具張眾耦皆同獻爵不吳  
各奏爾功歌狸首之詩曰大夫君子凡以庶士以燕以  
射則燕則譽予旣  
以名亭又爲之記

荷花館在城東北隅明萬厯間知府蔣以忠建崇禎十

四年知府歐陽主生重修

畿輔通志

今改為清暉書院

房

明歐陽主生記略唐柳宗元之紀零陵三亭也君子有遊息之物高明之具使之清甯平夷常若有餘然後理達而事成噫此非獨柳子之言也平干亦畿南都會也冠蓋之使相望萬厯中前守蔣君作荷花館於城外以待過客郡之有亭自此始蓋郡城環河種蓮故誌稱花類數種而其佳者則蓮蓮以廣平重也亭在城東北隅臨河上地歲月代謝風雨摧殘向之為臺榭欄楯者將付荒垣矣前此司李葛君一新之尋漸圯余以己卯冬至兵荒之餘不得遽以興廢為事今年稍有秋父老子弟浸浸有斟紅泛綠之想余於是與貳守王君司李余君永年令郝君圖所以治是館者而意以不欲傷民財力為兢兢會前守程君韋菴捐輸城工之餘存銀六百餘兩今秋順廣道徵其半以佐邢西開荒牛種費而其半儲帑如初余復與王君余君郝君各捐俸若干佐之約得千金余乃慨然曰是可以理吾亭矣於是就其原址構堂三楹顏之曰問意堂之前有臺翼然俯睨深池稍折而西故有亭址宛在水中央因改建而增廓焉余君則以君子亭題之右為香遠亭屬過客停驂所而

其後則特起層樓為真武閣為帝君祠遴僧守之原夫  
亭之建者歷年其頽折飄搖半繇於典守之未有其人  
余之招僧安神為典守計也而復以修葺餘資買地若  
干畝贍其香火衣食庶使可久哉是役也捐助協勞者  
貳守王君寵山西靈石人司李余君忠宸江西都昌人  
永年令郝君綱山東齊河人而廣平守廬陵歐陽主生  
為記胡鳳閣詩環城十里錦為雲菱葉蘋花晚並芬  
傳到碧筒籌幾換拈來彩筆韻初分柳藏臺樹筵清暑  
魚戲池波壁動文莫羨當年山簡事風流此會更誰羣  
暫返仙槎入水雲尊開涼閣占幽分煙凝曲檻風香  
合月下孤城夜色分為愛波清催洗盞還憐調  
合許論文芳洲是處堪移席燈火防驚鷗鷺羣

碧雲樓在縣境明申端愍公與鄭慧圃讀書處

通志 畿輔

遲山堂在縣境申鳧盟故居為雞澤殷宗山下榻因以

名之

同上 申涵盼詩曲砌疏欄繞石亭晴窗搖引  
竹陰青爐煙細細牙籤滿應借琴聲賦鵲鵲

矩園一名帖園李城南午橋西申鳧盟讀書處

縣舊志 申涵

加修治凡花木庭樹有增勿減昔李贊皇云以平泉一  
草一木與人者非吾子孫識者嗤其愚若此園雖微我  
先公平生遊覽之地一草一木手澤存焉其敢忽諸  
申涵盼矩園讀書記矩園卽帖園也丁酉歲讀書其中  
諸同人皆少年高才恐或放軼蕩檢相砥礪準於禮法  
且時方下帷爲舉子業務引繩切墨不爲詭御期於中  
的而後止以是偶以矩名矩園中共六人四人者寢食  
其中其二則間一至焉憶當二月上浣予與王子霖  
蒼步行至園時天猶微寒埽徑設榻晚宿於亭旁斗室  
夜大風雨室搖搖撼動雨歇同出園後立河上方遙望西山  
之得少假寐侵曉雨歇同出園後立河上方遙望西山  
霽色見有擔囊負笈指點問南園者穿徑而至至則殷  
子孟肩也晚出所攜酒共飲飲俱醉越一日顧子儒白  
至喜各如前約無食言也相與把杯道故又俱醉於是  
四人者晨夕相對呶唔不少輟亭中海棠及牡丹盛開  
時往年遊人接踵是歲皆從園外望不敢叩扉恐擾書  
帷也而四人者時或設席花底執書卷偃臥讀時或移  
案臨池摹古本法書明月旣上浮白狂呼花片片墮杯  
內漏凡三下俱醉寢矣來時攜酒少無何鼙竭園又僻  
左右無沾處幸午橋者去半里許青帘數家隨沾卽至

以是花開時夕夕醉比花謝乃已或亭方午散行河畔  
四人者一攜笛一攜右軍帖一喜性命之學而攜宋人  
語錄予獨攜彈碁左拓弓右握丸隔河彈林中黃鶯以  
爲戲幸技拙不至成禽鳥生間至小黃梁一訪仙蹟當  
是時岸上輶轡與舟中欵乃相答往來不絕見四人者  
科頭跣足行柳陰中皆以爲非塵世人云入盛暑上弦  
時席坐荻岸久旱河流淺清泓可沐沐畢復坐坐復飲  
飲且醉聞潺湲聲與石相激奔注而下則山雨新漲也  
坐園中者四閱月其二人則甯子元箸笈細昆弟家食  
貧不能遠出或文期至或訪友至至則或信宿或竟日  
暮而花晨月夕尤流連不忍去月嘗入九醉秋闈迫六  
人乃俱散去是年元箸售明年霖蒼鬱鬱死又一年元  
箸成進士爲史官又二年子亦成進士爲史官而孟肩  
孺白笈細三人者雖皆爲名諸生而猶落落數奇嗚呼  
矩園猶昔也雪案螢窗直昨日事耳今屈指已十年矣  
而前此五年中已卽有死生貴賤之不侔後此者其可  
知哉不知哉

# 楊陸凱宅在臨洛鎮

畿輔通志 王光燮弔楊將軍  
詩公生剛勇邁流俗力搏熊羆志

鴻鵠十九晉謁盧天雄願備戎行執矛鏐盧公一掌扶  
山河東南血戰掃千戈獎君桴鼓加君秩劄記今日堪  
摩娑京師聞警憂未艾詔下勤王督宣大墨纒苦塊馳  
朔風進軍鉅鹿列旌旆精兵罷卒陸相逢矢窮弦折兼  
絕饗高瑤坐擁何太酷大呼與目臨霜鋒惟君踴躍能  
同死身體髮膚何敢恃但得司馬手足全安惜骨穿千  
夫矢嗟嗟司馬不愧張睢陽浩氣直上千  
穹蒼偏裨捐軀更奇烈萬春霽雲相頡頏

案雞澤志陸凱永年人崇禎十年死督師司馬盧象  
昇之難乾隆九年重修廣平府志凱裔求紀其死節  
事邑令以掌牧難之因出陸凱守備劄珠印宛然令  
疑其贗堅不肯列志中其裔乃立碑於臨潞關南門  
外

察院行署在東大街後改講約所今廢

縣志

太僕寺行署在縣署北明崇禎間添設順廣道駐此今

改爲遊擊署

同上

同知署舊在府署左乾隆五年同知劉叔枚重修後移

廢

舊志

通判廨舊在府署右明萬厯間移廢

同上

理刑廳署在府署左今裁廢

同上

照磨所在府署右今裁廢

同上

司獄司在府署右今裁廢

同上

縣丞廨在縣署左今裁廢

同上

主簿宅在縣丞廨南今裁廢

縣志

遞運所在臨洛鎮今裁併入驛

舊志

宮保尙書坊大中丞坊俱在南街

爲肥鄉縣張學顏建

雁塔同登坊

姚三讓李杜

明時臺諫坊

姚三讓

獨步天衢坊

劉俸

翀霄坊

杜瑄

一品宮保坊

盧大中

大司空坊都憲坊亞卿坊

胡瓚

御史坊

連鑛

三世進士坊

連盛連鑛連三元

三世褒封坊  
蘭臺侍御坊  
內臺總憲坊  
申佑

兄弟進士坊  
徐珩 徐銳

奕世承恩坊  
盧廷珠 盧大謨 盧大節 盧大中 盧大順 盧大道

四世科甲坊  
杜秉彝 杜廕 杜縻 杜廓 杜汝亮 杜霽遠 杜汝縻 杜震遠

敦廉里坊  
蔡國熙

蘭臺直諫坊  
李養志

父子進士坊  
宋范 宋學道

繡衣坊二  
連盛 胡璣

柱史坊二  
胡應文 徐英

大中丞坊二  
連鑛 李堯德

諫議坊

周京

進士坊十

周京張大謨杜瑄胡瓚胡應文  
申綸焦澤王朝相申玠賀思聰

孝子坊

王辭輯

貞烈坊

周京妹  
俱同上

曲周縣

鉅橋倉在縣東北

大清一統志

衡漳北逕鉅橋邸閣西舊有

大梁橫水故有鉅橋之稱昔武王伐紂發鉅橋之粟以

賑殷之饑民服虔曰鉅橋倉名鉅鹿水之大橋也今臨

側水渚左右方一二里中狀若邱壘蓋遺囑故窖處也

水經

鉅橋倉在曲周

通典